

DISCOURS SUR LA

Lettre de Monsieur le Prince.

LES actions des Princes sont toujours de poix & d'importance. Ils donnent la loy au monde, & semble qu'il ne soit fait que pour eux; que le soleil ne luise que pour leur esclairer, & que quelques astres particuliers president à leur naissance. C'est aussi pourquoy leurs deportemens sont regardez d'un autre œil que ceux du commun, & chacun se mesle d'en vouloir penetrer le fond & les consequences: Et comme leurs vertus sont bien plus esclatantes que celles des autres hommes, leurs fautes, s'ils en font, sont beaucoup plus en veüe & plus remarquables. Nous faisons toutes sortes de discours sur cest esloignement de la Cour de Monsieur le Prince; & comme les nuées qui s'assemblent nous menacent d'orage, de mesme quand on a veu Monsieur le Prince s'assembler avec ceux qui sont de sa partie, on a eu crainte & avec raison, que cela n'excitast du trouble & du changement. En fin, sur ces discours & diuers iugemens des vns & des autres, on a apporté à la Roynne de la part de Mr. le Prince vne lettre en forme de manifeste pour iustifier ses actions, & faire voir à tout le monde les causes veritables de sa retraicte. On croyoit assez qu'elle estoit principalement fondee sur la ialousie du gouvernement, & estoit aisé à recognoistre où alloit l'indignation de M. le Prince, & sur qui particulierement il se vouloit

A

descharger. Il en parle auiourd'huy tout ouuertement, se plaint d'estre desfavorisé & reculé des affaires; qu'on ne luy en fait part qu'autant qu'il plaist à ceux qui gouernent; veut intéresser tous les Ordres du Royaume en ses plaintes & ressentimēs, cōme estans mal traitez tāt en general qu'en particulier; demāde la surceance des mariages de France & d'Espagne, & par dessus tout la cōuocatiō des Estats, pour dōner ordre aux desordres de la France. Ainsi ne reste-il plus de doute en nos esprits du mesçōtētemēt de M. le Prince, & de ceux qui l'assistēt. No^s sçauōs to^t que ceux qui ont voulu remuer en to^t les siecles, n'ont iamais māqué de plausibles & specieux pretextes; aiās tousiours couuert & masqué leurs entreprises ou deliberté, ou de biē public, ou de religion: Et ces mots sacrez ont esté les rets & les pieges pour surprēdre la simplicité des peuples. Mais Dieu a permis que tout aussi tost ils ont esté recōnus & descouverts, & biē que quelqu'vne de ces entreprises ayt eu du succez, si est-ce que la plus part ont esté malheureuses & infortunées. Et c'est pourquoy M. le Prince & ceux qui l'ont suiuy, ont grand interest de faire reluire par tout le monde leur innocence, faire voir iusques au fonds de leurs cœurs la sincerité de leurs intentions, & qu'ils n'ont esté touchez d'aucune ambition particuliere, pour se retirer de la Cour, & se rendre mal-contens: Au cōtraire que les seules cōsideratiōs publiques les ont emportez, cōme n'ayans autre but & autre obiet que le seruice du Roy, & le biē vniuersel du Royaume. Ce n'est pas seulement à la France qu'ils doiuent compte de leurs actions; mais il faut que

tous les Princes & Potentats en soient bien edifiez, qu'ils en iugent nettement & en leur faueur; Bref qu'ils soient deschargez enuers tous du blasme de ce remuement. Ils protestent par leurs escrits qu'ils sont sortis de la Cour, non pour sortir de l'obeyssance qu'ils doiuent à leurs Majestez, laquelle ils conserueront inuiolable, mais pour ne pouoir souffrir qu'autres ayent pris leur place, & se soient emparez du gouuernement de l'Estat: On diroit à les ouyr parler qu'ils nous renouellent la fable de ce Geryon à trois corps, & qu'en la personne de trois hommes tout l'Estat se remuë & se manie aujourd'huy, comme s'il n'estoit animé & inspiré que d'une seule ame. C'est là donc le principal sujet de leurs plaintes, que quelques particuliers regnent au milieu de nous dans la confusion, & ont vsurpé sous le nom du Roy vne auctorité absoluë; comme si on ne laissoit à leurs Majestez que le tiltre & l'image de la dignité royale, & que ces personnages ayent tiré à eux la force entiere de la domination, facent les Maires du Palais, les tuteurs du Royaume. Ils n'ont peu, comme ils nous disent, tellement se commander & forcer leur patience d'endurer plus longuement ceste oppression. Vn genereux desdain a saisi leurs ames. Ils se sont ralliez ensemble pour oster le desordre, & remettre en leur vigueur ancienne les loix du Royaume, qui n'ont pas à leur compte esté seulement violees en leurs personnes, mais en tous les Ordres de l'Estat. Que pouoient-ils donc faire en ces occurrences, lors qu'ils entendent la voix & clameur du peuple, qu'ils voyent les loix peruerties,

tout ordre renuersé, que de s'opposer au mal, & en
 faire tres-humbles remonstrances? Les Princes
 du sang à la verité sont enfans de la maison, inte-
 ressez en l'Estat; & apres le respect deu au souue-
 rain qui a toutes sortes d'obligations sur nous, on
 leur doibt vne particuliere recognoissance. Mais
 toutes ces submissions ne se rendent aux Princes
 du sang que par reflexion, comme estans les ima-
 ges du souuerain: Car lors qu'il s'agit du seruice
 du maistre commun de tous, lors sans condition,
 sans exception, il y faut courageusement porter
 nos vies & nos fortunes. Ils seront tousiours bien
 receus à proposer les bons & salutaires aduis, &
 faire ouverture de ce qu'ils iugeront necessaire
 pour le seruice du Roy & le bien del'Estat: Mais
 il faut que ce soit par les voyes legitimes, & qu'ils
 taschent d'obtenir ceste reformation des desor-
 dres tant desirée & attenduë des gens de bien, par
 moyēs doux & gracieux; non point en se separans
 de leurs Majestez, mais en s'vnissant plus estroite-
 ment avec elles pour la conseruation de leur au-
 thorité. Certes le Souuerain est tousiours interessé
 en l'honneur des Princes de son sang, qui ne peu-
 uent estre blessez que le contrecoup n'en vienne
 iusques à luy. Ils sont les membres honorables
 de l'Estat, & sur eux s'appuye & se soustient
 principalement le corps de la Monarchie: Mais
 ces membres ont tousiours leur rapport au chef,
 sans lequel ils ne peuuent subsister. Ce sont
 branches qui n'ont vie que du tronc. Ils sont
 comme la palme qui ne peut estre hors de son
 terroir naturel qu'elle ne languisse, & si on la veut
 transplanter, elle ne produit aucun fruit. Bref la

grādeur des Princes du sang n'est qu'une ombre, à bien parler, sans l'ayde & assistance du Souuerain. Ils n'ont en partage que la gloire de l'obeyssance, & faut qu'ils reglent leurs desseins, captiuent leurs volontez sous les loix de sa domination. La Monarchie est tousiours indiuisible & incōmunicable. Et le throsne royal est comme celuy d'Alexandre, où c'estoit crime seulement de s'asseoir; la societé ne s'y mesle point; les Roys sont impatiens d'autre grandeur que la leur; Et tout Monarque veut estre le seul arbitre de tout ce qui se passe en son Estat: Autrement c'est sapper ou esbranler les fondemens de la Monarchie qui ne regarde que l'vnité. Ce n'est pas que les bons Roys comme les nostres, ferment iamais l'oreille aux iustes remonstrances de leurs subiects, & que particulierement les Princes du sang n'y doiuent auoir la meilleure part, & estre escoutez par dessus tous. Mais il faut qu'ils portent leurs vœux & leurs intentions aux pieds de leurs Majestez avec toute sorte de respect & de ceremonie, & se souuiennent tousiours qu'il suffist aux Rois d'opposer à leurs subiects quels qu'ils soient la Majesté de l'Empire. Si le feu est en la maison, on ne refuse point leurs aydes pour l'esteindre. Les Princes du sang ne porteront iamais en leurs mains le tison fatal de la France, & ne pourront pas regarder du haut d'une tour l'embrasement de leur patrie: Si nostre Estat est malade qu'ils nous donnent les remedes, s'ils en ont, pour sa guarison: nous ne les pouuons attendre d'une main plus amie & plus fauorable. Si l'ennemy est au Capitole qu'ils viennent hardiment

le secourir ; ils y ont la premiere & plus estroite obligation. Si l'eau entre de toutes parts dans le vaisseau, & que les Pilotes qui le conduisent n'en manient le timon, comme il est necessaire, ains l'abandonnent aux vents & aux flots, ils ont plus d'interest que nuls autres d'y mettre la main, & empescher le naufrage. On adore de tout temps les bienfaicteurs publics cōme dieux tutelaires, & nul ne resiste à son salut, ny au bien vniuersel du pays. Toute entreprise qui a pour sa fin l'vtilité publique, est tousiours favorisee des vœux communs des gens de bien : Mais au contraire si elle ne regarde que le particulier, Dieu permet aussi tost qu'elle soit dissipée à la confusion de ceux qui sont auteurs des nouveautez. Or la marque la plus certaine pour discerner le bon zele d'auec le mauuais, & faire iuger qu'on n'est poussé que d'une sainte affection, c'est quand on ne mesle point son interest priué avec le public, mais qu'on se donne & deuotie tellemēt au bien du pays qu'on s'oublie soy-mesme, & qu'on renonce à son propre bien. Et à la verité les plus beaux desseins sont tousiours suspects & odieux quelque glorieux pretexte qu'ils ayent sur le front, quand on croit que nos interests priuez nous rauissent & nous emportent, & que les maux publics ne nous touchent, & ne se font sentir que d'autant que nous en auōs nostre part. Si le seul but des intentiōs de Monsieur le Prince est d'auoir pres de leurs Majestez le rang qui luy est deu, & que nul ne luy peut oster, & avec cela d'embrasser à bō esciēt la reformatiō de l'Estat, n'est-il pas biē aysé de luy dōner toute sorte de contentement & de satisfactiō ?

Cār qui luy peut enuier l'vn, & s'opposer à l'autre ? Mais si au contraire nous estions si mal-heureux que le prix de ceste esmotion fust sa grādeur particuliere, & qu'il ne mesurast le public que par son interest, n'aurions nous pas vn grand regret de nous estre si aisement laissez surprendre & persuader ? De verité nous pouuons dire avec le bon-heur de la Frāce & la louiange de Mr. le Prince, que sa conduite & son proceder depuis son esloignement de la Cour sont autant de clairs tesmoignages de l'integrité de ses actions, & que iusques icy il n'y a rien encore qui soit subiect à sinistre interpretation. C'est ce qui rend ses plaintes, & ses remonstrances plus dignes d'estre entendues : Mais quoy ! Nous auons esté si souvent trompez sur de semblables pretextes, tāt de gens ont contrefait autresfois les zelateurs du public, ont soupiré en apparence la peine & le mal du peuple, ont si bien imité la voix des pasteurs, comme l'Hyarne, quand elle les veut deuorer, que si nous n'auons aujourd'huy vne iuste cause de desfiance, pour le moins sommes-nous excusables, si apres l'experience de tant de maux passez, nous craignons d'y retomber, & ne donnons pas foy du premier coup aux paroles, quoy que fondees sur de grandes apparences. Toutes societez en vn Estat Monarchique, incogneuës au Souuerain, sont tousiours suspectes. Et pour parler franchement, n'estoit-il pas desirable, que sans donner l'alarme à toute la France, sans faire tant de bruit & tant d'esclat, & en vn mot, sans s'esloigner de leurs Majestez, il eust pleu à Monsieur le Prince de faire icy, ou pour le moins de tenter les

mesmes effects? Il ne faut pas tousiours croire à toutes sortes d'esprits. Les ames vlcerees reçoivent volontiers ce qui flatte leurs passions; mais apres elles y ont regret; & se plaignent en elles mesmes du mauuais conseil qui les a seduits. Et quand ce ne seroit qu'au bruiet de ceste retraicte, plusieurs mal-contents se resueillent de toutes parts, & que ceux qui ont besoing d'une guerre civile pour leurs incommoditez priuees, seront tres-aises de changer de condition, n'est-ce pas quelque desplaisir d'auoir esté porté à ces extremités, qui peuuent, sans y penser, causer ces maux publics? Le pretexte de la guerre du bien public sous le Roy Loys XI. est l'image de ce remuement. Les Princes & Seigneurs du Royaume se plaignirent lors d'estre reculez des affaires, & qu'on esleuoit des personnes qui n'estoient de leur qualité. Voicy les mots d'un Historien du temps : *Que les Princes & Seigneurs de France n'estoient pas contents de ce que le Roy ne les appelloit point, & ne se conseilloit à eux de la conduite des grāds affaires du Royaume, mais se conseilloit & gouuernoit par gens qui n'estoient de leur cōdition.* Ils demanderent l'assemblee des Estats, cōme le souuerain remede cōtre les desordres, & le seul moyē de pacifier les troubles. Le Roy mesmes se soubsmist à l'assemblee conuoquee à Tours : Les plaintes estoient que la Iustice estoit mal administree, le peuple surchargé, mauuais ordre au gouuernement. On establit pour reformateurs, des Commissaires que l'on appella les Reformateurs du bien public. Mais tournons le feuillet; Reconnoissons quels fructs produisit ce remuement : Ceux
qui

qui en escriuent nous apprennent que ces reformateurs qui n'auoient que la grandeur du Royaume & le soulagemēt du peuple à la bouche conuertirent le bien public en leur particulier, & qu'eux seuls en profiterēt, que chacun capitula pour soy, & que le salut du peuple qui deuoit aller deuāt toutes choses fust postposé aux intereſts priuez. Or qui est la cause auourd'huy de nos esmotions, & d'auoir porté nos Princes à ceste nouueauté, si ce n'est la jalousie du commandement, & de se voir comme ils prétendent postposer à ceux lesquels ils estiment n'auoir aucun droit au gouuernement de l'Estat? Nous deuons croire neantmoins, que M. le Prince & ceux qui l'assistent sont emportez d'autres considerations que ces Princes du tēps de Loys XI. & que le seul amour du bien de l'Estat les fait plaindre du gouuernement present: Mais il faut voir si leurs plaintes sont iustes, & ne faut pas condamner les hommes qu'ils accusent, & encor des hommes qui ne sont pas du cōmun sans les ouïr: Ainsi Philippes demāda peut-estre aux Atheniens les Orateurs qui estoient comme la garde de la bergerie, Ainsi Cesar changea les Magistrats qui lay estoïēt suspects, lors qu'il eust mis fin aux guerres ciuiles: Ce sont des coups qu'ils firent l'un & l'autre d'auctorité absoluë, & apres s'estre rendus les maistres. En France, nous pouuons dire à l'honneur de nos Roys, qu'on n'a gueres iusques icy entrepris de heurter les Magistrats sans cognoissance de cause, Il ne faut pas que la condamnation aille deuant l'accusation, comme le tonnerre va deuant l'esclair; ce seroit iniu-

Rice & tyrannie. Et quoy que bien souuent la
 voix du peuple semble crier contre les principaux
 ministres, si ne la faut il pas escouter legerement.
 Il y faut garder les formes accoustumees, des-
 cendre & voir, discerner le faux d'auec le vray, de-
 mesler l'innocence d'auec la calõnie. Et comme
 la Iustice a ses poids, ses mesures & ses nombres,
 recognoistre aussi & peser exactement la verité de
 toutes choses. Si en France quelquefois on s'est
 autrement porté à l'endroiect des premiers Offi-
 ciers, cõme nous en auons des exemples regret-
 tables, mesmes lors de la captiuité du Roy Iean,
 & de l'indisposition de Charles V I. telles actions
 extraordinaires ne se doiuent tirer à cõsequence,
 il les faut rapporter à la violence du temps, &
 tousiours se tenir & s'attacher à la regle. Je ne puis
 oublier vn exemple memorable des Seigneurs,
 & conseillers du temps de Charles V I I. lesquels
 il fut contraint d'esloigner de soy pour auoir paix
 auec Philippes Duc de Bourgoigne. Ce bon Roy
 se sentoit grandement interessé en la perte de ses
 bons & loyaux seruiteurs, & ne les vouloit aban-
 donner qu'à toute force. Mais ils furent les pre-
 miers à le persuader : ils donnerent au bien de la
 France leurs interests priuez, & quiterent la Cour
 pour le seruice de leur maistre. C'est vn exẽple ra-
 re, & d'vn excez d'affection extraordinaire qui ne
 doit pas faire loy ; mais plustost qui apprend
 aux Princes à pourueoir sagement, qu'ils ne soiẽt
 point contrainsts de tomber en pareils incon-
 ueniens. Nous scauons que le iuste mescon-
 tentement des peuples procede lors que les char-
 ges du Royaume ne sont point distribuees par me-

rire, que l'Eglise est opprimée, la Iustice mal administrée, les Finances mal mesnagées, le peuple surchargé. Nous pouuons dire avec raison que s'il y a quelque chose à desirer en l'Estat, le mal n'est point si extreme, & venu à tel excez qu'il ne puisse receuoir guarisō, si ceux qui peuuent dans l'Estat y veulent contribuer leurs aydes comme ils doiuent. Et qui iugera sans passion cōme toutes choses ont esté maniees depuis le deceds lamentable du feu Roy, sera contrainct d'auouer que le gouuernement ayant esté conduict par peu d'hommes, sous la regence de la Roynne, & la Monarchie aucunement temperee, il faut ainsi dire, par Aristocratie, nous n'auons pas ressentý de si mauuais effects qu'on n'y puisse remedier. Et quoy qu'on se plaigne qu'és affaires publiques & importātes, il y a eu des coups frappez au preiudice de la grandeur de ceste couronne, si est ce que parauāture il seroit mal-aisé d'arguer & censurer si auant les conseils que les principaux ministres ont donnez, qu'on ne les peust iustifier par bonnes raisons. Le peuple en toutes nations a esté noté du vice de legereté, & semble qu'il hayssé tousiours l'Estat present, & qu'il insulte à ceux qui gouuernent. Les plus iustes en tous Estats & Republiques n'ont pas esté exempts de ces rencontres. Ce sont malades qui voudroient bien changer de liēt, & ne changeront pas de mal pourtant. Mais il ne leur faut pas permettre qu'avec grand'prudence, & en cela estre charitables par dessus la cognoissance des peuples. Ce n'est pas de mesme des grands, les

quels estans nourris dans le monde ne sont point
 subjects à ceste foiblesse, sont touchez d'autres
 mouuemens que le peuple, & pourueu qu'ils ne
 soient preoccupez de passion, ne condamneront
 pas legerement & sans cognoissance de cause les
 actions de ceux qui manient les affaires. Ils sca-
 uent trop ce mot ancien, qu'on ne gaigne iamais
 gueres à changer de Roys & de Magistrats. Ce-
 luy qui fouilloit dās la sepulture d'Antigonus, &
 disoit qu'il cherchoit le Roy Antigonus, nous vou-
 loit apprendre que son successeur estoit encor
 plus rude que le defunct, & son joug moins sup-
 portable. Mais quoy qu'il en soit, il faut hayr le
 vice & non les hommes; & tous ces Messieurs qui
 se plaignent ont grand interest de faire paroistre
 qu'ils sont poussez à ceste haine des principaux
 Magistrats, par le seul zele public, par le salut cō-
 mun & non par leur particulier ressentiment. On
 disoit de Cassius, qu'il haysoit plus Cesar en pri-
 ué que le tyran en public: Aussi bien souuent la
 hayne & la vengeance nous picquent & trāspor-
 tent plus que les considerations publiques. C'est
 à quoy il faut prendre garde de peur d'estre trom-
 pez, & d'enuelopper l'innocēt avec le coupable:
 Bref il est necessaire de s'acquérir vne exacte co-
 gnoissance des actions & deportemens de ceux
 qu'on accuse, auant que s'emporter à la rigueur
 d'vne condamnation. Ils nous marquent encor
 entre leurs plaintes, qu'on a fait sans eux les ma-
 riages de France & d'Espagne, & en demandent
 la surceance iusques à l'assemblée des Estats.
 C'est vne crainte parauanture imaginaire que

beaucoup de personnes se formēt en leurs esprits, que par ces mariages nous faisons vn pont à l'Espagnol pour prendre auantage sur nous, & que nous hastions par ceste alliance les mauuaisēs destinees de la France. Je sçay qu'il y en a qui croient que c'est vne espee de prodige que nous puissions iamais estre vnīs ensemble de cōeur & de volonte, & que c'est plustost vn effect du ciel que de la terre d'estraindre ces deux Estats d'un nœud d'amitiē ferme & indissoluble, & ioindre deux nations de si diuerses humeurs, d'un temperament si inegal & disproportionné. On nous a tant de fois entretenus de ce desir qu'on dit estre hereditaire aux Rois d'Espagne de ioindre les fleurs de lys à leurs armes diuersifiēes, qu'il est bien mal-aysē que beaucoup de François perdent si tost ceste opinion, & que ceste alliance ne leur soit suspecte. On dit qu'aux sacrifices de Iunon coniugale, on n'offroit point le fiel de l'hostie immolee, pour monstrier qu'ēs mariages tout doit estre plein d'amitiē & de concorde : mais ils craignent que nonobstant ces mariages, il reste tousiours du fiel & de l'amertume parmy nous. Et ne fut ce pas Iulia qui acquit à Cesar son pere la puissance de son mary, avec laquelle Cesar releua sa fortune, & bastist ses entreprises? Certainemēt il faut auoir que pour iuger des grandes affaires, il faut des ames non seulement vuides de passion, mais pleines de cognoissance. Les plus belles actions sont ordinairement les plus sujettes à calomnie, soit par malignité, soit par ignorance. Les yeux malades ne peuuent souffrir ce qui est trop

vif & trop brillant, ils se plaisent & recreent davantage aux couleurs sombres & obscures : de mesme les plus hautes & releuees actions ne laissent aux yeux de la pluspart que de l'esclair & de l'estonnement. Mais tout ainsi qu'on ne void point les fondemens des plus beaux & superbes edifices, qui ne delaissent pour cela de se faire admirer, Aussi ne peut on pas tousiours penetrer & recognoistre les causes, les motifs & les bases des plus hauts desseings, blasmez bien souuent par l'apparence, quoy que tres-salutaires en effect. Or ne peut-on pas dire avec raison que le seul bruit de ces alliâces n'a point esté inutile durât la minorité de nostre Roy, pour rassermir tousiours le sceptre en sa main, dissiper les factions de son Estat, & empescher que d'autres nous preuinssent en nos desseings, & fissent iusques dans l'Escurial des traictez & des pratiques à nos despense. Ce n'est pas que la France ne se puisse passer de ceste alliance. Elle subsiste par elle mesme, & quand elle sera bien vnüe, elle est inuincible, & donnera terreur à toutes autres nations. Mais confessons que nos diuisions intestines nous portent quelques-fois à rechercher des remedes extraordinaires pour sauuer le corps de l'Estat. Et quand nos Princes voudront estre informez, s'ils ne le sont, des vrayes raisons de ceste alliance, peut-estre en demeureront-ils satisfaits, & seront d'accord qu'elle a esté traictee avec vn grand iugement & prudence exquisse de ceux qui gouuernent. Les secrets des Estats doiuent estre communiquez à peu. Le peuple qui a tousiours

les passions desreglees, comme i'ay desia touché, n'en est pas capable, & seroit dangereux de les luy fier & communiquer. Aussi ne luy appartient-il pas d'en faire iugemēt : mais il faut qu'il se reserre dās les bornes de son humble obeysance, croyāt que ceux qui conduisent les affaires sous l'autorité de leurs Majestez font tout pour le mieux, & apportent en leurs conseils toute sorte de fidelité & de suffisance. Il n'y a que les grands du Royaume à qui la cognoissance en est deuē, & qui peuvent avec le respect accoustumé demander compte de ce qui se passe. Mais il faut aussi qu'ils se montrent exempts de toute passion, qu'ils balancent les choses au poix de la raison, & que par là ils iugent des affaires. Mais quoy qu'il en soit lors que le Roy sera paruenū à sa maiorité, qui est par la grace de Dieu si proche de son terme, il donnera la loy non seulement à ses subjets mais à soy mesme, il sera l'arbitre de ses volontez, il iugera ce qui est vtile pour le bien de son Estat : Et lors & grands & petits flechiront sans contredit & sans murmure sous les commandemens. Mais voicy pour mettre Monsieur le Prince & ceux qui le suyuent en leur tort. Ils demandēt les Estats; Prenons les au mot, comme desia leurs Majestez par lettres publiques escrites aux Provinces les ont sagement preuenus. Ceste conuocation d'Estats est de verité necessaire quand les plaintes sont publiques, & n'y a point de plus certain remede à nos maux que celuy là. C'est de la consolation aux affligez qu'on entende leurs plaintes, & qu'on face demonstration de les

vouloir soulager. C'est vn moyen de contenter les peuples, de faire voir en plains Estats quel est l'ordre du gouuernement, comme les affaires sont maniees, les chargés & honneurs distribuez, les Finances mesnagees, le desir qu'on a de repurger l'Eglise, reformer la Iustice, & soulager le peuple. C'est mesme de l'auantage aux Roys de prendre cognoissance des affaires, & abbaissier leurs sceptres & diademes pour communiquer avec leurs subjets, s'instruire de ce qui se passe, afin d'y donner l'ordre necessaire. Aux Estats les Roys entendent la voix de la verité qui leur est le plus souuent cachee par diuers artifices; estant trop certain qu'on leur desguise beaucoup de choses lesquelles s'ils entendoient, comme il seroit souhaitable, donneroient autre remede & prouision aux affaires qu'ils ne font bien souuent. C'estoient les plaintes des plus grands Empereurs du passé, que trois ou quatre personnes les assiegeoient & tâchoient à les surprendre. Et c'est ce qui faisoit que nostre bon Roy Loys XII. ne desdaignoit la conuersation des petits du Royaume, pour se rendre par ce moyen capable des fautes des grands, & y remedier. C'est donc en ces assemblees qu'on parle franchement & veritablement; Au lieu que nos langues & nos pensees sont le plus souuent captiues, & qu'il semble qu'on ne puisse qu'avec peine souffrir la parole d'un homme libre nourry genereusement, & qu'on ne veuille que ces gés de seruice qui n'ont autre but que de cōplaire, & qui apportent vne espee d'obediēce, auet-
 gle à

gle à tout ce qu'on leur commande. Ceux qui
fuyent, ou condamnent telles assemblees, sont
ceux-là ordinairement qui veulent seul gou-
uerner, qui n'ont aucune regle en leurs actiōs,
disposent de tout à leur volonté, assiegent le
Prince & empeschent tant qu'ils peuuent
que d'autres n'en approchent. C'est en ces
compagnies que les grands & vertueux per-
sonnages ont autresfois resisté courageuse-
ment au desmembrement de l'Estat, & se sont
opposez aux alienations ruineuses qu'on a
voulu faire des plus beaux fleurons de la cou-
ronne; & particulierement à celle du Roy
Iean, de Charles sixiesme, & de François
premier. C'est là qu'on peut regler la venaliré
profuse & indigne des charges tant militaires
que de iudicature: & faire qu'à l'aduenir elles
se distribuent non au poix de l'argent, mais au
prix du merite. C'est-là qu'on demande com-
pte hardiment à ceux qui ont mal-versé en
leurs charges. C'est-là qu'on a descouuert au-
tresfois ceux qui pour n'en rendre point, nous
ont jettez à l'imitation de ce Grec, en vne guer-
re Peloponesiaque. Comme aussi c'est la gloire
des principaux Ministres & Magistrats s'ils sōt
accusez du desordre, de faire voir en si bonne
compagnie l'innocence & integrité de leurs
vies. Bref c'est par ce moyen que le Royaume
s'est tousiours maintenu iusquesicy en son en-
tier. Et tant s'en faut que les Estats diminuent
l'auctorité royale, qu'ils l'affermissent d'auan-
tage; & monstrent comme tout le Royaume

representé en corps d'Estats recognoist son Roy comme son Prince absolu & Souuerain, auquel il s'adresse en tout respect & humilité, pour luy faire ses tres-humbles supplications & remonstrances. On peut voir sur ce subiect les harangues faictes aux Estats tenus à Tours, Orleans & Blois, qui tesmoignent avec quelle reuerence on a parlé aux personnes sacrees de nos Roys, pour receuoir leurs commandemens. Voylà donc les fructs que ceste assemblee d'Estats nous peut produire, si nous sommes si foux d'en sçauoir faire nostre profit. Et peut-estre qu'une petite compagnie bien choisie de gens de bien, amateurs de la paix, & de l'honneur de la France pourroit faire le mesme effect, si ceste autre plus grande assemblee ne se pouuoit si promptement conuoyer. Mais en attendant ce bon-heur tant souhaitté des gens de bien, faisons cesser prudemment les causes de toutes ces esmotions, & bastissons tous vnanimement vn temple à la Concorde. Reconnoissons qu'on ne peut remuer en France que on ne reduise toutes choses en vne miserable confusion. Que tous ces mouuemens sont contraires à la disposition presente du corps de ceste Monarchie, laquelle affoiblie de la longue maladie des troubles passez ne commençoit qu'à respirer & reprendre haleine sur les derniers iours du feu Roy. Serions nous si miserables de la rejeter aux maux dont à grād' peine elle est eschappée? La paix establie par la prudence & valeur de ce grand Prince auoit aucu-

remettre refermé & cōsolidé les playes de l'Estat.
 Ne les ouurôs point, & souuenons-nous tous-
 iours que les guerres ciuiles sont maladies des
 Estats, qui deuiennent mortelles & incurables,
 s'il ny est promptemēt remedié. C'est vne ma-
 xime que tous ceux qui troublent, taschent à
 trouuer leur appuy ou dans le peuple ou dans
 la Noblesse : Car il faut tenir les villes, ou la câ-
 pagne. La Noblesse est trop liée à la Monarchie
 pour s'en separer. Le peuple a trop resenty les
 funestes effects des troubles passez pour y re-
 tourner. Pauvre peuple qui as tant de subiect
 de te recognoistre par l'experience de tes mise-
 res, pourrois-tu te rembarquer en vne mer ou
 tu as tant de fois pensé perir, veu que tu es en-
 cor tout degouttant du naufrage ? Mais disons
 vray ! Le peuple n'est-il pas semblable à la mer
 qui de soy est calme & paisible si les vents ne
 l'agitent ? Et n'est-ce pas aux bons Pilotes à re-
 cognoistre ces vents qui soufflent & pre-
 seruer le vaisseau malgré la tempeste ? Je ne
 doute point qu'il ne soit facile à leurs Ma-
 jestez d'asseurer l'Estat contre tous ces vents
 & tous ces nouveaux flots qui se sont esle-
 uez, & conduire ce vaisseau au port de sa-
 lut. Nous sommes dans vne barque qui porte
 César & sa fortune. Nous deuons croire que
 nous ne pouuons perir. Les mariniers prennēt
 bon augure de leur voyage, & s'asseurent d'e-
 stre deliurez de la tourmente, lors que non seu-
 lement ils voyent l'astre d'Helene, mais quand
 les feux de Castor & Pollux luisent sur eux.

Leurs Majestez fortifiees encor d'un fils de France nous donnent occasion de ne rien craindre. On dict que l'Isle de Delos auparauint errante fut raffermye par l'enfantement de la Deesse Latone: Ainsi l'heureuse naissance des enfans de France a raffermy l'Estat qui sembloit esbranlé. Et il faut esperer que Dieu qui a monstré sa toute-puissance en la conseruation de cest Estat, & en l'affermissement du sceptre es mains de nostre ieune Roy, voire par dessus nos attentes, & quasi contre toute esperance humaine, acheuera son œuvre, couronnera les desseins de nostre Roy de toutes sortes de prosperitez & benedictions. Mais si faut-il tousiours se souuenir que les meilleurs & plus sages Pilotes obeyssent quelquesfois à la tempeste, cedent au temps & à la necessité, iettent en mer de la marchandise pour sauuer le vaisseau. Et les plus grands hommes d'estat fleschissent & biaissent quelquesfois aux grandes affaires; imitans le Soleil qui ne tient pas tousiours sa route droicte, mais avec sa ligne torse & oblique maintient & conserue toutes choses en bonne & agreable température. Nous scauons comme à Rome es successions publiques on s'accommodoit prudemment avec le peuple, à fin d'establiir la concorde. Si ce mesme Senat Romain ne se fust roidy contre Cæsar & depuis contre Antoine, & ne les eust iertrez au desespoir, ou pour le moins donné couleur & pretexte d'entreprendre, il n'eust veu changer la forme de sa Republique, & perdre

la liberté. C'est vn effect digne de cest autre
accort Empereur, qu'un trait de plume
puisse faire, ce que bien souuent beau-
coup de sang respendu ne pourroit gagner.
Et ne vaut-il pas mieulx faire croire qu'on ne
se desie pas, que d'irriter & effaroucher hors de
saison vn sujet qui se seroit vn peu desbandé?
L'histoire de Crassus soubçonné de la conjura-
tion Catilinaire, quoy que peut estre à tort &
contre verité, nous fournit d'exemple bien
remarquable. Le Senat dissimula par pruden-
ce, ne se voulant enquerir plus auant, & con-
demna l'accusateur plustost que l'accusé. Mon-
sieur le Prince & ceux qui l'on suiuy publient
par tout qu'ils ont esté forcez à se retirer, apres
auoir souffert tout ce qui est possible d'endurer
à des esprits genereux. Que c'est vne necessité
violente qui les a portez où ils sont. Qu'ils ont
mieulx aymé se bannir de la Cour, que de s'y
voir come en mespris & hors du rāg que la nais-
sance leur dōne. Que leur intētiō n'est point de
troubler l'ordre, & l'harmonie de l'Estat, mais
oster le desordre, faire regner les loix, & remet-
tre le Royaume en sa forme & dignité anciēne.
S'il leur imagination les a trompez, faisons leur
charitablement recognoistre leur erreur. Don-
nons leur qu'ils ayent esté emportez par les
passions les plus sensibles aux ames courageu-
ses. Et ne seroient-il pas deserteurs du lieu
qu'ils tiennent en France s'ils n'en auoient du
ressentiment, soit pour le public, soit pour le
particulier? Ne sont-ce pas les colonnes que

soustiennent nostre Estat, lesquelles on ne peut esbranler tant soit peu que l'edifice n'aille par terre? Ne leurs desloions point les choses justes, de peur de les reduire à demander les injustes. Ne seroit-il pas d'agereux de les porter aux extremitez & qu'ils fussent contrains de croire qu'il n'y auroit plus de salut qu'en leurs armes? La necessité red quelquesfois les armes sinõ justes, pour le moins tolerables, qui autrement seroiēt vniuersellemēt condamnées; & qui court sur son esclauel'espee à la main, luy donne par la loy naturelle quelque liberté de se defendre. Souuenons nous plustost que les couronnes les plus glorieuses sont celles qui se donnoient anciennement pour auoir sauué les citoyens. Arrestons ceux qui sont sur le bord du precipice & les sauuons d'une main charitable. Ne leur donnons point de sujet de desfiance, cōme tousiours les foibles sont en allarme des plus puissants. Nous dirons encores avec l'honneur de Monsieur le Prince qu'il ne s'est point iusques icy desbauché de son deuoir, ne s'est point destourné du chemin Royal. Il le faut reioindre & rapprocher de leurs Majestez: C'est le rige de saint Loys; & chacun sçait que la ruine des Princes du sang tire tousiours avec soy vne ruine ineuitable du Royaume. Mais outre tout cela, nous n'ignorons point la meslange & confusion qui est parmy nous, & comme il y auroit du peril d'esmouuoir les mauuais humeurs du corps de l'Estat. Nous sçauons a nostre grand regret, qu'il est comme diuisé en

23

23

Deux parts : N'y en faisons point naistre vne
troisieme. Estouffons dès leur naissance ces
mouuemens, calmons par prudence ces ora-
ges, rejettons tous conseils violens qui ne peu-
uent qu'affoiblir l'Estat, & mettre d'ailleurs
l'auctorité de leurs Majestez en compromis.
Estant trop certain que depuis qu'on a vne fois
secotié le joug de l'obeissance, & gousté la dou-
ceur du commandement, ou d'une faulx liber-
té, on ne peut qu'avec peine retourner à son
devoir, & qu'en fin on tombe insensiblement
en vne Anarchie. Les Roys en ces desordres
des guerres ciuiles ne sont pas tousiours les
maîtres absolus. Il y a trop de parts & de fa-
ctions. On a trop d'affaires à contenter ceux
qui perpetuellement se plaignent, & qui veu-
lent faire croire que tout despend d'eux. C'est
vn vaisseau de Danaïdes qui ne se peut remplir.
Chacun des grands veut auoir son fleuron, &
nul ne veut seruir que sous bons gages. Rien
n'est si perilleux en vn Estat que la guerre ciu-
ile, mesmement en la minorité des Roys, qui
souffrent long temps auant qu'ils puissent re-
gagner leur auctorité, & dompter leurs peu-
ples. Il faut recourir aux vrais remedes, auant
que le mal deuienne incurable; & puis qu'il est
en la puissance de leurs Majestez de mettre le
Royaume en repos, & nous faire iouir de cette
heureuse & profonde paix, sous la faueur de la-
quelle nous viuions, n'est-ce pas le plus seur
conseil qu'on leur puisse donner, pourueu que
l'auctorité leur demeure entiere, de composer

ce trouble sans nous engager à vne guerre funeste & miserable ? Certainement ceux qui n'ont pour but que le seruice du Roy, & le bien de la France seront tousiours desireux de cette paix, hayront tout remuement & nouueauté qui n'apporte en fin que ruine & desolation à tous Estats. Mais qui voudroit troubler ce calme & cette serenité, sinon ceux qui esperent dans les naufrages publics ramasser les pieces du vaisseau ? Qui voudroit r'allumer les feux de nos diuisions que ceux qui penseroient dans cete combustion publique, tirer leurs commoditez particulieres ? Ne les croyons point, & ne soyons si imprudents de nous precipiter à vn naufrage tout certain, ou dresser nous mesmes le buscher, comme ces mal-heureux Gymnosophistes pour nous y brusler miserablement. N'est-il pas plus desirable que ces eaux qui se sont destournees rentrent en leur canal ordinaire, & en fin que tout reuienne & retombe en ce grand Océan de la Royauté ? N'est-il pas plus seur d'esteindre promptement ce feu qui couuoit sous les cendres, & luy oster la matiere & l'aliment ; de peur qu'il ne consume & deuore vne partie de l'Estat ? C'est vn precepte de quelques Philosophes qu'il ne faut iamais attizer le feu avec l'espee : Ils vouloient dire qu'il est dangereux d'irriter ceux que la colere transporte, & les reduire comme au desespoir. Plustost les faut-il ramener par la raison, & les vaincre par la douceur, charmes tres-puissants vers les ames bien mees, & qui sont ordinairement

mēt plus d'effect que la crainte & la violence, aufquelles comme aux foudres mal-faisants les Roys ne doiuent iamais venir qu'à toute extremité. Mais aussi d'un autre costé s'il est vray que M^r le Prince a ce zele vertueux de se rendre instrument de la reformation de nos desordres, doit-il rechercher ce bien-la par vne voye rigoureuse, & y proceder autrement qu'avec l'ordre & les formes accoustumées? Faut il apporter le feu, & le cautere pour guarir les playes de l'Estat? s'il y a quelque maille en l'œil, faut-il creuer l'œil? s'il y a quelque petite Isled' Aegine qui empesche la commodité du port de Piræe, faut-il pour cela esmouuoir ciel & terre, & donner insensiblement un exemple de remuement aux sujets? Qu'apportent ces nouueautez que le mespris des loix & du Souuerain, & finablement qu'une dissipation d'Estat? Ne nous trompons point! Nos maux ne se guariront iamais que par remedes doux & gracieux, & qui en cherche d'autres, & veut vser de violens & de corrosifs, ne fait qu'accroistre & irriter le mal. Sur tout Monsieur le Prince se doit souuenir qu'entre la Diuinité & la Royauté, il n'y a point de puissance moyenne: Que nul ne partage l'autorité avec les Roys, Qu'il faut doucement & franchement ployer sous leur domination: Que c'est auiourd'huy à la Roynie à donner la loy au Royaume, comme celle à qui en appartient le gouvernement, tant par

l'accord & consentement des Princes & Officiers de la Couronne, que par l'Arrest de la Cour des Pairs si solemnellement prononcé. Monsieur le Prince doit croire que sa Majesté qui luy a tousiours rendu preuue de sa bien-veillance redoublera ses biens-faits, multipliera ses graces, luy conseruera les prerogatiues qui luy sont deuës. Bref qu'il ne tiendra qu'à luy-mesme, s'il ne remplist le lieu d'honneur que sa naissance luy donne comme premier Prince du sang, & qu'aucun ne peut debattre. Mais quoy! Ne peut-il retenir son rang & iouir de ses droicts sans remüer & allermer toute la France? Faudroit-il par vne malediction tragique partager son heritage au trenchant de l'Espée? Nous voyons bien que les plaintes sont dressees contre trois ou quatre personnes. Mais le mal seroit comun à tous: Et de nous engager sur ce pretexte à vne guerre du bien public, helas qu'y trouuerions nous qu'un mal tout public & vniuersel, & au lieu d'une reformation par auanture imaginaire, des calamitez presentes? Donnons au bien general de la France les interests priuez, portons tous & grands & petits nostre seruice aux pieds de leurs Majestez, & tout bon-heur nous arriuera. Il n'y a point d'autre remede à nos maux, n'y d'autre salut pour la France. Et qui ne doit craindre la iuste indignation de son Roy? N'est-ce pas le dire du sage que qui le fait courroucer peche mortellement contre son ame?

Les Roys sont les enfans du Ciel, & Dieu qui est le vray fondateur des Monarchies, en est aussi le protecteur, a vn soing particulier de ses Oincts qu'il assiste visiblement. Et tant d'exemples des siecles passez, qui nous font voir comme la Prouidence diuine les conserue, sont autant de Registres ou nous apprenons que les entreprises faictes contr'eux sont tousiours suiuiues d'une malheureuse issuë. Les Princes & grands du Royaume sont trop interessez en l'Estat, trop attachez à la Monarchie pour la vouloir deschirer & desmembrer, Et encor' pouuons nous dire avec raison, que nous auons trop d'assurance en Monsieur le Prince, pour croire qu'il vueille iamais fouiller son nom de ceste tache, de s'opposer aux volontez de leurs Majestez; mais que tout son but & toute son intention n'est autre, que de les faire regner avec plus de gloire & d'auctorité, releuer ce Royaume en plus grande splendeur & restablir toutes choses en meilleur ordre. D'un rige si illustre comme celuy de Bourbon, il ne peut iamais sortir que toute fidelité. Oublieray-je trois paroles, biens notables de la lettre de Monsieur le Prince ? Elles meritent d'estre icy enchassees pour l'obliger d'auantage. *Qu'il ne faict comme ceux qui saisissoient des villes, armoient le peuple, & les estrangers, faisoient guerre & paix à leur profit sans se soucier de la reformation publique.* Et de verité ces actes ont tousiours esté iugez si indignes de loyaux

subiects, que ceux mesmes qui les ont commis,
 ne les ont voulu iamais auoier comme actes
 d'hostilité ou de rebellion. Et est chose remar-
 quable que les Princes qui ont esté cy deuant
 contrainsts par le malheur de la France de pren-
 dre les armes sur la cause ou pretexte du bien
 public, & de la religion, n'ont iamais desaduoié
 le Roy; ains tousiours protesté que leurs armes
 n'estoient leuees que pour le faire obeir & luy
 rendre son auctorité, qu'on luy auoit vsurpee.
 Et ont tousiours eu ce soing particulier d'inse-
 rer aux Edicts que tout ce qu'ils auoient fait
 estoit pour le service du Roy & bien de l'Estat;
 Ceste clause estant, comme chacun sçait, l'un
 des principaux fondemens des Edicts. Tant a
 de pouuoir sur les vrais François, le deuoir na-
 turel & le respect de la Majesté royale! Croyõs
 donc que monsieur le Prince & ceux qui l'ont
 suiuy, n'ont intention que de bien faire: Obli-
 geons leur foy par ceste creance: Assurõs nous
 qu'on n'arrachera iamais les Fleurs-de-lys de
 leurs cœurs, que la racine y est tousiours viue,
 & qu'ils sont tous aussi jaloux que leurs peres
 de la grandeur de la France. On cognoit assez
 qu'elle est inuincible, si elle ne tourne les ar-
 mes contre elle-mesme. Ce nous seroit trop de
 reproche, qu'au lieu d'estre bien vnis & nous
 rendre redoutables par ceste vnion, nous fus-
 sions la fable de l'estranger, en hazard d'en
 estre la proye. Esperons que tous ceux qui se
 sont esloignez de la Cour, donneront à l'amour

du païs leurs ressentimens particuliers , & se joindront tous ensemble plus que iamais au service du Roy , & au bien commun de l'Estat. C'est la vraye vnion, C'est le syncretisme autresfois tant vanté. Et c'est par ce moyen que Dieu inspirant à tous l'esprit de paix & de concorde , les animera d'avantage a l'honneur & exaltation du Royaume. Il ne faut que les ramener par prudence , & les rapprocher de leurs Majestez , en faisant cesser les causes de cest esloignement. Nostre Monarchie est vne iuste Principauté sur des hommes libres, qui portent plus franchement leurs vies & leurs biens au service de nos Roys, que ne font par contrainte les subiets de tous autres Princes. Mais aussi iamais ceste grace n'a esté desniee aux bons & loyaux subjects , & particulièrement aux grands interessez en l'Estat, d'estre escoutez en leurs raisons & remonstrances, quand elles vôt au biē general & reſtabliſſemēt du Royaume. Et c'est à quoy il est aujourd'huy necessaire de pourvoir ſoubz l'auctorité du Roy par les arts de la paix, & les voyes legitimes & que leurs Majestez ayent ceste gloire d'auoir la meilleure part à vn ſi bon œuvre tant ſouhaité & attendu des gens de bien. Les Roys ont dès leur naiſſance vn esprit magnanime & reſolu. Ce ſont plantes diuines qui portēt les fruiçts auſſi toſt que les fleurs. Il ne faut point d'autre exemple à noſtre Roy, avec la bonne institution qu'on luy donne, que celuy de ſes ma-

jeurs, pour l'exciter aux belles & vertueuses actions. C'est sur ce patron-là qu'il faut former la ieunesse, & que par la memoire glorieuse de nos Louys, de nos Charles, de nos Philippes, de nostre Henry le Grand, il soit inspiré d'un genereux desir à les surmonter. C'est d'eux aussi qu'il doit apprendre à bien regner, & se souuenir tousiours qu'ils ont heureusement manié leurs sceptres, quand ils en ont fait hommage à Dieu, & qu'ils luy ont rendu la mesme subiection & recognoissance qu'eux-mesmes desirent de leurs subjects.















